



Broj: 02-50-1-16-42/10

Sarajevo, 21. 1. 2010.

ZAPISNIK

42. sjednice Doma naroda

Parlamentarne skupštine Bosne i Hercegovine,
održane 21. 1. 2010. godine

Sjednica je počela u 11,15 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 15 delegata.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija te sredstava javnog informiranja.

Prije utvrđivanja dnevnog reda, delegat Dušanka Majkić predložila je da se s dnevnog reda skinu sljedeće tačke:

- Prijedlog zakona o Ustavnom sudu Bosne i Hercegovine, s Mišljenjem Ustavnopravne komisije (prvo čitanje), predlagač: delegat Slobodan Šaraba;
- Prijedlog zakona o dopuni Zakona o državnoj službi u institucijama Bosne i Hercegovine (prvo čitanje), predlagač: delegat Slobodan Šaraba;
- Prijedlog zakona o dopuni Zakona o Vijeću ministara Bosne i Hercegovine (prvo čitanje), predlagač: delegat Slobodan Šaraba.

U raspravi o prijedlogu delegata Dušanke Majkić učestvovali su: Slobodan Šaraba, Božo Ljubić i Mladen Ivanić.

S tim u vezi delegat Božo Ljubić predložio je da se usvoji inicijativa kojom bi se zadužilo Vijeće ministara BiH da pripremi izmjene i dopune Zakona o Vijeću ministara BiH, Zakona o državnoj službi i Zakona o reviziji institucija.

Povodom navedenog prijedloga Bože Ljubića, Slobodan Šaraba izjasnio se da će svoje prijedloge zakona povući iz parlamentarne procedure ako se na sjednici Doma naroda usvoji inicijativa delegata Bože Ljubića.

Navedena inicijativa usvojena je u okviru tačke 1. dnevnog reda: Odgovori na delegatska pitanja i delegatska pitanja, te su uz saglasnost delegata Slobodana Šarabe navedene tačke skinute s dnevnog reda 42. sjednice Doma naroda.

Delegat Slobodan Šaraba tražio je i da se u dnevni red sjednice uvrsti tačka Razmatranje zaključka Zajedničke komisije za ljudska prava, prava djeteta, mlade, imigraciju, izbjeglice, azil i etiku, usvojen na 18. sjednici Zajedničke komisije, održanoj 5.2.2009., a koji se odnosi na lica smijenjena odlukom visokog predstavnika za BiH.

S tim u vezi Dom naroda je, uz saglasnost delegata Sloboda Šarabe, odlučio navedenu tačku dnevnog reda razmatrati na sljedećoj sjednici Doma naroda.

Dom naroda jednoglasno je usvojio sljedeći izmijenjeni

D N E V N I R E D

1. Odgovori na delegatska pitanja i delegatska pitanja;
2. Usvajanje zapisnika 40. i 41. sjednice Doma naroda;
3. Zahtjev Vijeća ministara BiH za razmatranje Prijedloga zakona o izmjenama Zakona o klasifikaciji djelatnosti u Bosni i Hercegovini po skraćenom postupku, u skladu s članom 121. Poslovnika Doma naroda;
4. Prijedlog zakona o izmjenama i dopunama Krivičnog zakona Bosne i Hercegovine (drugo čitanje), predlagač: Vijeće ministara BiH;
5. Prijedlog zakona o izmjeni Zakona o državnoj službi u institucijama Bosne i Hercegovine (drugo čitanje), predlagač: Vijeće ministara BiH;
6. Prijedlog zakona o izmjenama i dopunama Zakona o carinskoj tarifi Bosne i Hercegovine (prvo čitanje), predlagač: Vijeće ministara BiH;
7. Prijedlog zakona o zaštiti novih sorti bilja u Bosni i Hercegovini (prvo čitanje) predlagač: Vijeće ministara BiH;
8. Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini (prvo čitanje) predlagač: Vijeće ministara BiH;
9. Razmatranje Godišnje platforme o obavještajno-sigurnosnoj politici, predlagač: Predsjedništvo BiH;

10. Informacija o izdatim dozvolama za promet oružja, vojne opreme i proizvoda dvojne namjene u 2008. godini;
11. Davanje saglasnosti za ratifikaciju Šestog dodatnog protokola na Ustav Svjetskog poštanskog saveza;
12. Davanje saglasnosti za ratifikaciju Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini;
13. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Savezne Republike Njemačke o finasijskoj saradnji u 2008. godini.

Ad. 1. Odgovori na delegatska pitanja i delegatska pitanja

Odgovore na delegatska pitanja dobili su Zoran Koprivica, na pitanje postavljeno na 39. sjednici Doma naroda, Slobodan Šaraba, na pitanje postavljeno na 38. sjednici Doma naroda, i Hazim Rančić, na pitanje postavljeno na 39. sjednici Doma naroda.

Delegati Zoran Koprivica i Slobodan Šaraba izjasnili su se da su zadovoljni dobivenim odgovorima.

Delegat Hazim Rančić izjasnio se da nije zadovoljan dobivenim odgovorom te je **ponovio pitanje i zatražio** da se, uz Strategiju modaliteta načina razrješenja stare devizne štednje kod Ljubljanske banke, Invest banke Beograd i drugih nedomicilnih banaka, precizno napiše i dostavi šta su i koje su mjere i modaliteti preduzeti na zaštiti bosanskohercegovačkih građana, a vezano za staru deviznu štednju kod nedomicilnih banaka.

Delegat Hazim Rančić postavio je sljedeće pitanje: Vijeću ministara BiH, Ministarstvu sigurnosti BiH, Ministarstvu civilnih poslova BiH, Državnoj agenciji za istragu i zaštitu - SIPA, Graničnoj policiji, Upravi za indirektno oporezivanje BiH, Službi za poslove sa strancima i Nezavisnom odboru kao nezavisnom tijelu policijskih struktura:

Da li će na vrijeme, prije posjete ekspertnih misija Evropske komisije, biti ispunjeni svi preostali uslovi iz Mape puta za liberalizaciju viznog režima?

Delegat Drago Ljubičić postavio je sljedeće pitanje Institutu za nestala lica

Udruženje za traženje zarobljenih boraca i nestalih civila iz Broda prijavilo je Institutu za nestala lica BiH grobnice s posmrtnim ostacima stradalih u prethodnom ratu, koje se nalaze u mjestu Kolibe i Vrela - Općina Brod.

Koji je razlog da nakon 60 dana od prijavljivanja grobnica u Kolibama, Općina Brod, predstavnici Instituta za nestala lica BiH nisu ekshumirali posmrtno ostatke koji se u nekim grobnicama nalaze na njihovoj površini?

Delegat Ivo Miro Jović postavio je sljedeće pitanje Vladi Federacije BiH i Federalnom pravobranilaštvu:

S kolikim brojem vojnih stanova je raspolagala Federacija BiH, od tog broja koliko je dodijeljeno stanova u periodu od 1992. godine do danas, po kojem osnovu je izvršena dodjela stanova i da li su se primjenjivali navedeni propisi, koliko je lica otkupilo stanove do aprila 1992. godine ili upisano kao vlasnici, koliko je dodijeljeno stanova nakon 6.12.2000. i po kojem osnovu, koliko je ostalo neriješenih stambenih predmeta i koliko je ostalo stanova na raspolaganju za dodjelu po osnovu Zakona o vraćanju, dodjeli i prodaji stanova.

Delegat Slobodan Šaraba postavio je sljedeće pitanje Vijeću ministara BiH:

U kojem iznosu Vijeće ministara BiH planira posebno pomoći područje Hercegovine kao i neka druga područja na teritoriji BiH pogođena katastrofalnim poplavama prije 15- ak dana?

Delegat Dušanka Majkić postavila je sljedeće pitanje Službi za poslove sa strancima BiH:

Prema podacima koji su se nedavno mogli pročitati u medijima, iz Bosne i Hercegovine su protekle 2009. godine protjerena 474 strana državljanina. Pored toga, postoje saznanja da postoji veliki broj stranih državljana koji još nisu otkriveni a treba da budu protjerani iz BiH.

Mjere protjerivanja stranaca iz BiH odnose se uglavnom na lica koja predstavljaju prijetnju sigurnosti BiH, pravosnažno osuđena lica i lica koja su ilegalno prešla državnu granicu.

Molim direktora Službe za poslove sa strancima da mi odgovori na sljedeća pitanja:

Koliko u ovom trenutku u BiH ima stranih državljana koji su proglašeni prijetnjom po sigurnost BiH koji treba da budu protjerani a koji još nisu otkriveni?

Kojeg porijekla su ti građani?

Zbog kojih krivičnih djela su proglašeni prijetnjom po sigurnost BiH?

Kolikom broju stranih državljana je dodijeljeno državljanstvo BiH u DKPBiH, da li su dodijeljena državljanstva obuhvaćena revizijom te koliko je poništenih državljanstava?

Delegat Dušanka Majkić u okviru delegatskog pitanja uputila je sekretaru Zajedničke službe Parlamentarne skupštine BiH sljedeću inicijativu:

„Da se za narednu sjednicu Doma naroda dostavi pregled svih delegatskih pitanja na koje delegati u Domu naroda nisu dobili odgovor“.

Delegat Mladen Ivanić postavio je sljedeće pitanje Upravi za indirektno oporezivanje:

Da li je Upravni odbor Uprave za indirektno oporezivanje donio odluku o retroaktivnom oslobađanju od plaćanja PDV-a jednom broju preduzeća koja posluju preko slobodnih zona?

Ako jeste, o kojim preduzećima se radi, o kojim iznosima je riječ i koji je zakonski osnov za tu odluku?

Dom naroda **jednoglasno je usvojio inicijativu** delegata Bože Ljubića koja glasi:

Dom naroda traži od Vijeća ministara BiH da pripremi izmjene i dopune Zakona o Vijeću ministara BiH, Zakona o državnoj službi i Zakona o reviziji institucija.

Obrazloženje

Cilj je unaprijediti odgovornost institucija od nivoa Vijeća ministara BiH, preko ministarstava, uključujući i odgovorna lica u ministarstvima i ostalim institucijama, tako da se status ministra i zamjenika, između ostalih, veže za rezultate revizije, na način da se ministru daju veće nadležnosti u ocjenjivanju pa i smjenjivanju odgovornih državnih službenika uključujući generalne sekretare i pomoćnike, kao i izmjene Zakona o reviziji na način da traži decidirane stavove, pozitivne ili negativne, kako bi se na osnovu toga mogla praktimirati i odgovornost ministara i zamjenika te ostalih državnih službenika.

Ad.2. Usvajanje zapisnika 40. i 41. sjednice Doma naroda

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je usvojio** zapisnika 40. i 41. sjednice Doma naroda.

Ad. 3. Zahtjev Vijeća ministara BiH za razmatranje Prijedloga zakona o izmjenama Zakona o klasifikaciji djelatnosti u Bosni i Hercegovini po skraćenom postupku, u skladu s članom 121. Poslovnika Doma naroda

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Zoran Koprivica i Slobodan Šaraba.

Dom naroda je, s 14 glasova „za“ i jednim „suzdržanim“ glasom, **usvojio** je zahtjev Vijeća ministara BiH da se Prijedlog zakona o izmjenama Zakona o klasifikaciji djelatnosti u Bosni i Hercegovini razmatra po skraćenom postupku.

Ad. 4. Prijedlog zakona o izmjenama i dopunama Krivičnog zakona Bosne i Hercegovine (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, Božo Rajić, Dušanka Majkić i Drago Ljubičić.

Dom naroda je, s 13 glasova „za“ i jednim glasom „protiv“, **usvojio** Zakon o izmjenama i dopunama Krivičnog zakona Bosne i Hercegovine s dva amandmana koja su identična amandmanima usvojenim u Predstavničkom domu:

Amandman I.

U članu 56., koji se odnosi na dodatni član 145 a., stav (2) briše se, a u stavu (3) brišu se riječi: “i (2)“.

Amandman II.

U članu 56. stav (4) briše se.

Ad. 5. Prijedlog zakona o izmjeni Zakona o državnoj službi u institucijama Bosne i Hercegovine (drugo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi je učestvovao Ivo Miro Jović.

Dom naroda jednoglasno **je usvojio** Zakon o izmjeni Zakona o državnoj službi u institucijama Bosne i Hercegovine u predloženom tekstu.

Ad . 6. Prijedlog zakona o izmjenama i dopunama Zakona o carinskoj tarifi Bosne i Hercegovine (prvo čitanje), predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, ministar vanjske trgovine i ekonomskih odnosa Mladen Zirojević, Božo Ljubić, Drago Ljubičić, Dušanka Majkić, Adem Ibrahimpašić, Ivo Miro Jović i Zoran Koprivica.

Dom naroda **jednoglasno je usvojio u prvom čitanju** Prijedlog zakona o izmjenama i dopunama Zakona o carinskoj tarifi Bosne i Hercegovine sa sljedećim zaključkom:

S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o izmjenama i dopunama Zakona o carinskoj tarifi Bosne i Hercegovine, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine saobraćaj i komunikacije Doma naroda Parlamentarne skupštine BiH na kojoj će biti razmatran.

Ad . 7. Prijedlog zakona o zaštiti novih sorti bilja u Bosni i Hercegovini (prvo čitanje) predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Milad Zeković, direktor Uprave BiH za zaštitu zdravlja bilja, Alma Čolo, Dušanka Majkić i Božo Ljubić.

Dom naroda **jednoglasno je usvojio u prvom čitanju** Prijedlog zakona o zaštiti novih sorti bilja u Bosni i Hercegovini sa sljedećim zaključkom:

S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o zaštiti novih sorti bilja u Bosni i Hercegovini, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH na kojoj će biti razmatran.

Ad.8. Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini (prvo čitanje) predlagač: Vijeće ministara BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Alma Čolo, ministar vanjske trgovine i ekonomskih odnosa BiH Mladen Zirojević, Adem Ibrahimpašić, Božo Ljubić i Zoran Koprivica.

Dom naroda **jednoglasno je usvojio u prvom čitanju** Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini sa sljedećim zaključkom:

S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o izmjenama i dopunama Zakona o politici direktnih stranih ulaganja u Bosni i Hercegovini, produžava se amandmanska faza za ovaj prijedlog zakona do 48 sati prije održavanja sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH na kojoj će biti razmatran.

Ad .9. Razmatranje Godišnje platforme o obavještajno-sigurnosnoj politici, predlađač: Predsjedništvo BiH

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali: Ilija Filipović, Hazim Rančić, Ivo Miro Jović, Božo Rajić, Drago Ljubičić, Adem Ibrahimpašić, Božo Ljubić, Dušanka Majkić i Branko Zrno.

Dom naroda, s jednim glasom “za” i 13 glasova “protiv”, **nije usvojio** Mišljenje Zajedničke komisije za nadzor nad radom Obavještajno-sigurnosne agencije BiH, te je Godišnju platformu o obavještajno-sigurnosnoj politici vratio nadležnoj komisiji na ponovno razmatranje i dostavljanje novog mišljenja.

Dom naroda je, povodom razmatranja i rasprave o ovoj tački dnevnog reda, usvojio sljedeći prijedlog drugog zamjenika predsjedavajućeg Ilije Filipovića:

“Da Dom naroda utvrdi nove smjernice Zajedničkoj komisiji za nadzor nad radom Obavještajno-sigurnosne agencije BiH u smislu brisanja dijela teksta na stranici 4. u Poglavlju II A – Obavještajno prikupljanje podataka
„ ... prava BiH na izlazak na otvoreno more”.

Na ovaj način bi Godišnja platforma o obavještajno- sigurnosnoj politici bila prihvatljiva i za Klub hrvatskog naroda u Domu naroda Parlamentarne skupštine BiH, a Godišnja platforma bi i dalje sadržavala tekst: **“Prikupljanje podataka koji će doprinijeti rješavanju otvorenih pitanja državne granice”**, ali bez navođenja bilo kakve pojedinosti, jer je to zadatak državnih organa vlasti u čijoj je to nadležnosti.

Dom naroda također je usvojio i prijedlog prvog zamjenika predsjedavajućeg Dušanke Majkić da se, prilikom ponovnog razmatranja Godišnje platforme o obavještajno-sigurnosnoj politici, na sjednicu Zajedničke komisije pozovu predstavnici Vijeća ministara BiH i Predsjedništva BiH.

Dom naroda usvojio je i prijedlog delegata Hazima Rančića da se nakon riječi: "prava BiH na izlazak na otvoreno more" dodaju riječi: u "skladu s međunarodnim pravom".

Ad .10. Informacija o izdatim dozvolama za promet oružja, vojne opreme i proizvoda dvojne namjene u 2008. godini

Predsjedavajući Doma naroda otvorio je raspravu o ovoj tački dnevnog reda. U raspravi su učestvovali Branko Zrno i Hazim Rančić.

Dom naroda je, s 10 glasova „za“ i jednim „suzdržanim“ glasom, **primio k znanju** Informaciju o izdatim dozvolama za promet oružja, vojne opreme i proizvoda dvojne namjene u 2008. godini sa sljedećim zaključkom:

Primanje Informacije k znanju ne znači istovremeno i proces potpune demokratske kontrole uvoza i izvoza oružja i vojne opreme, te se od nadležnog ministarstva zahtijeva da:

- postupa u skladu sa zakonskim odredbama kojima se regulira pitanje prometa oružja i vojne opreme i u utvrđenim rokovima izvještava Parlamentarnu skupštinu BiH o prometu oružja i vojne opreme;
- uz Informaciju o izdatim dozvolama za promet oružja, vojne opreme i proizvoda dvojne namjene dostavlja i podatke o stvarno realiziranom izvozu/uvozu oružja, vojne opreme i proizvoda dvojne namjene po izdatim dozvolama, kao i o odbijenim zahtjevima za izdavanje dozvola.

Ad.11. Davanje saglasnosti za ratifikaciju Šestog dodatnog protokola na Ustav Svjetskog poštanskog saveza

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je dao** saglasnost za ratifikaciju Šestog dodatnog protokola na Ustav Svjetskog poštanskog saveza.

Ad . 12. Davanje saglasnosti za ratifikaciju Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je dao** saglasnost za ratifikaciju Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini.

Ad.13. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Savezne Republike Njemačke o finasijskoj saradnji u 2008. godini

Predsjedavajući Doma naroda otvorio je raspravu o ovoj tački dnevnog reda. Nije bilo delegata prijavljenih za raspravu.

Dom naroda **jednoglasno je dao** saglasnost za ratifikaciju Sporazuma između Vijeća ministara Bosne i Hercegovine i Vlade Savezne Republike Njemačke o finasijskoj saradnji u 2008. godini.

Sjednica je završena u 14,09 sati.

Sastavni dio ovog zapisnika je neautorizirani transkript 42. sjednice Doma naroda.

SEKRETAR
DOMA NARODA
Marin Vukoja, s.r.

PREDSJEDAVALAČI
DOMA NARODA
Sulejman Tihić, s.r.